

## 107 學年度國語文競賽八年級閩南語朗讀

### 01 小金英飛去佗

後山人

你頭殼內一定有這欸畫面：佇田岸邊、鐵枝路、石頭縫，發出一蕊一蕊黃黃的花，風若吹來規欉齊振動。小金英就是用這種姿勢，都市、庄跤攏有伊的影跡，不時對你微微仔笑，恬恬仔等你欣賞伊的嬌。

阮兜的釋迦園開規片的小金英，日頭光一下照，規片黃錦錦，有夠嬌！自細漢去園裡，攏是一行幾若名。大人雕桎、笪花、剪釋迦，阮囡仔人就趁耍。灌杜猴、欲草蟪仔、跔圳溝邊耍水，逐項攏通好耍。扮公伙仔上趣味，野花野草滿滿是，煮一頓仔腥臊請人客。小金英花蕊嬌，剪來插花斡，葉仔青青做菜炒，花子輕輕歎一下就飛做滿天星。

熱人，阿媽就喊阮共小金英規欉轉去，也好飼鴨仔、鵝仔，也好曝焦通燃茶，也好賣予中藥行趁寡外路仔來飼豬公。阿媽講小金英退火、顧肝、勇身體，摻烏糖落去大鼎燃，淋落去，哎喲喂！嘛是猶閣苦嗲嗲。阿爸講彼欸滋味叫做苦甘苦甘，就親像人生有苦才有甜，毋免驚艱苦，人生就會有五彩的色水。

我讀小學的第一工，阿爸牽我去學校，自細漢我就閉思閣無膽，想著家己一个人，親像孤鳥插人群，雙跤就必必掣，共阿爸的手摸牢牢毋敢放。阿爸□我四界熟似學校的環境，伊指予我看，運動埕、壁角、花坵邊仔，攏有小金英的影跡。伊挽一蕊焦去的花予我，我出力歎，花子一枝一枝飛對遠遠遐去，這是阮平時仔上愛耍的齣頭。花子一下仔就無看見影，阿爸講小金英予風吹散去矣，飛去別位，無論去到佗位，攏會閣再勇敢釘根生滋。看著熟似的小金英予我心肝頭真安定，我勇敢放開阿爸的手，飛入去教室，飛入去一个閣一个人生的坎站。

出外讀冊、食頭路，小金英熟似的形影，親像序大人對我的關心佻照顧，不時跟綴佇我的身軀邊。伊是勇敢的記號，提醒出外的囡仔愛歡喜面對新環境，勇敢釘根發穎，一四界行透透閣會當開甲嬌嬌嬌。

## 107 學年度國語文競賽八年級閩南語朗讀

### 02 恰阿媽做伴

陳美雪

阿媽，你目睷瞞瞞，乖乖緊睷喔！明仔載阿母欲□咱去看花，較早睷才有精神喔！你的尿苴仔已經換好勢，你有感覺規身軀誠焦鬆無？來，倒予好勢，毋通踢被才袂寒著。你緊睷，毋免驚！阿孫的佇邊仔讀冊恰你做伴。

聽阿爸、阿母講，你上疼我這個閩十外年才閣生的厝仔孫。因為其他的內、外孫攏大漢矣，無人欲綴你。退休遮爾濟冬，猶閣有孫通抱，你笑甲喙仔裂獅獅，共我抱咧四界去展寶，就算恰朋友去遊覽嘛一定會□我去。淡水、溪頭、阿里山、關仔嶺……真濟風景區攏有咱媽孫仔的形影。

「一放雞，二放鴨，三分開，四相疊……」阿媽，這是你教我的。逐擺看你共子仔擲過來、擲過去，連鞭摸鼻，連鞭摸耳，我干焦喙仔開開，共你拍嘆仔的份爾爾。

這幾年來你一直咧退化，定定袂記得這、袂記得彼。全款的一件代誌，你攏愛問幾若擺。有時飯碗才放落，去一逝便所出來，看著桌頂猶未收的飯菜，你就又閣喝欲食飯矣。阿母驚你退化傷緊，買真濟□退物仔，叫我陪你耍。

拄好我嘛是彼種「食予肥肥，激予槌槌」，無愛用頭殼的因仔，真正是「一兼二顧，摸蜆仔兼洗褲」。彼站仔，咱媽孫仔有時行跳棋、有時耍牌仔……，兩個人嘛會因為想欲贏對方，煞來起冤家。毋過咱猶是耍甲誠歡喜。猶毋過，我贏你的機會愈來愈濟，害我煞毋知是欲歡喜抑是愛煩惱？

這站仔，你跤手無力，行路行袂好勢，出外著愛托拐仔抑是坐輪椅。有時屎尿嘛無法度控制，只好包尿苴仔。遮的代誌攏予你誠礙虐，甚至對家己失去信心、無安全感，致使若無人佇你的身軀邊，你就睷袂去。

阿媽，你緊睷，毋免驚，我會陪佇你的身軀邊，就親像細漢的時，你陪我睷全款。這馬我會揀你去公園看花、看雲、看風景，就親像較早，你□我四界去□退全款。

阿媽，你緊睷，毋免驚！阿孫的佇邊仔恰你做伴。

## 107 學年度國語文競賽八年級閩南語朗讀

### 03 烏嘛嘛

吳令宜

彼暗，我覆佇阿母的胸坎咧軟奶，雄雄一陣人行倚來，嗤嗤吡吡。無張持，一雙手共我抱起來，我的喙猶是軟奶的喙型，喙角嘛猶津一滴阿母的奶水，我就予人口離開阿母燒烙的身軀邊。

彼暗，冷風 hū-hū 叫，我予人用一條索仔縛佇路邊的一樣樹仔跤，寒甲直直顫，嘛驚甲毋敢睏，大細聲哀。阿母無來救我，嘛無人插我，放我一个佇遐吼規暝。

天拍痞仔光，我忝甲眯一下仔，就予人恰車的聲吵精神。目睷睷開，看著正片是車路，倒片是一个資源回收場。亂操操的鐵籠仔疊甲懸懸懸，lok-koh-sok-koh 的物件鎮甲規四界，不時閣有水對回收場流出來。四界澹糊糊，予我感覺又閣寒又閣溼。

這馬敢是秋天？無，跤邊哪會遮濟樹葉仔，擲頭一下看，樹仔頂的葉仔有影落甲欲了矣。我徙過來、行過去，彼條索仔予我袂當揣著焦鬆的所在通倚。我足寒的，嘛足想阿母的。

無偌久，有一个縛毛尾仔、揸一个粉紅仔冊揸仔的查

某囡仔行來我的身軀邊，跔落來摸我的頭。伊陪我耍一睏仔，就隨倚起來，行對人行道彼片去，閣不時越頭來看我。

自按呢，我定定看著這個查某囡仔行對我遮過，伊嘛攏會停落來恰我耍一下仔才離開。尾仔我才知影，伊是附近一間學校的小學生。

我的主人毋知是良心發現，抑是聽著我逐暝寒甲哼哼叫。總算佇一擺寒流來進前，替我釘一跤狗籠仔，予我有一个睏會落眠的所在。

雖然我覘佇籠仔內，毋過逐早起，我攏會聽著彼个查某囡仔咧叫我：「烏嘛嘛……」我就隨精神，一直共搖尾，一直舐伊的手。我足愛伊恰我講話，摸我的耳仔恰下頰，因為按呢我才有予人惜、得人疼的感覺。

一段日子了後，彼个查某囡仔煞無閣再出現，我的孤單，化做一聲一聲的「啊嗚—啊嗚—。」煞予主人罵講：「予你籠仔睏，予你飼料食，猶閣烏白喙。」

我掠主人金金看，閣再「啊嗚—。」

## 107 學年度國語文競賽八年級閩南語朗讀

### 04 愛讀暗學仔的阿母

陳秋貴

聽講較早的暗學仔，是咧予無讀冊的人欲學捌字才去讀的。這馬的暗學仔無仝囉，齣頭加誠濟款，欲學啥就有啥。愛學東學西的阿母，逐工都排甲湊湊，規禮拜攏無閒□□。

拜一暗，去社區大學上「草藥班」的課。阿母講：「大自然賜予咱遮濟天然的藥草，無去共熟似誠無彩。」閩講：「青草仔捌是寶，毋捌是草。認捌青草，會予人珍惜地球的每一枝草，每一樣樹仔。」伊嘛誠反對人噴殺草劑，講按呢，會予誠濟有路用的藥草絕種去。

拜二暗，佇鄉土文學館咧讀「昔時賢文」佻「臺灣三字經」。阿母講：「昔時賢文是早前的□人留落來的智慧，咧教做人的道理，每一句的來源，攏是有典故的。」看阮讀冊無認真，就共阮講：「讀書須用心，一字值千金。」啊若「臺灣三字經」，是 1900 年新竹王石鵬先生所寫的，伊的寫法模仿三字經，予人較好記。

拜三暗，去學英語。聽講這位對高中退休的英語老師誠□教，阿母嘛學甲誠認真。毋管是透大風抑是落大雨，

攏毋捌請假。逐工，英語講義□咧，讀甲歡頭喜面。伊講：「欲共少年時學無好的英語，好好仔閣學起來。」

拜四暗，佇社區的社團學電腦。阿母講：「這馬是資訊發達的世代，袂使佻社會脫節。」定定看伊坐佇電腦頭前咧使用「一指神功」，嘛定定咻我去共伊教。看起來，學電腦對阿母來講有較困難淡薄仔。

拜五暗，就較輕鬆矣，咧學挨絃仔。毋過，嘛是阮較艱苦的時陣。人講：「一□二簫萬世絃。」絃仔愛學一段時間才挨會好聽，拄開始學的阿母是鋸甲誠歡喜，啊阮規家伙仔是聽甲強欲擋袂牢。

論真講起來，讀暗學仔予阿母心情加誠好，逐工精神百倍。阿母講：「學問是讀冊來的，智慧是見識來的。食一歲，學一歲。」讀暗學仔毋但會當學著知識，閣會當交著朋友，人生嘛加誠有意義。